

Keerlke 2007 för Helmut Hinrichs

De Keerlke-Pries 2007 gung dit Jahr an en Galionsfigur för dat Plattdütske in 't Harlingerland. Mit Helmut Hinrichs word en Mann mit de Keerlke ehrt, de sük in sien lange Leven van nu 83 Jahren för sien plattdütske Moderspraak insett hett. Oostfreesland hett hum up völ Rebetten en heel Bült to verdanken.

As Schoolmester, mit dat Leit in de Grundschool un later in de Realschool, hett he sük froh för Plattdütsk insett. He hett an dat Oostfreeske Leesbook un an de "Leuchtboje", Leesgood för de heimatkundliche Unnerricht, mitschreven. Later hett he mit de Schoolversök "Engelsk in d' Grundschool" ok daarför sörgt, dat Kinner heel froh Kuntakt mit de engelske Spraak kregen. Van 1961 bit 1969 was he Kreisvörsitter van de oostfreeske Mestervereen un arbeidde mit an dat Book "Die Geschichte der Realschule Wittmund". Noch as he an de domalige Pädagogische Hoogschool in Ollenbörg studeerde, gründde he mit Frünnen de Heimatvereen Wittmund un was daarmit in de ehrenamtliche Kulturarbeid in Oostfreesland bold en "Institution". Van 1965 of an hett Helmut Hinrichs de Landkreis Wittmund in de Oostfreeske Landskupp mit vertreden. He warkde in verscheden Arbeitsgruppen mit un wurr 1996 Ehrenlidd. Butendeem hett Hinrichs en heel Bült plattdütske un hoogdütske Schrievarken up d' Padd brocht un sük in 'n besünner Wies mit dat Beleven van de Jöden in Wittmund befaat.

He hett mitwarkt an dat plattdütske Wordenbook van Byl/Brückmann un broch dat plattdütske Sülvenraadsel „Driest noch wat tolehren, ok in uns Moderspraak“ in sien Kuntrei up de Padd. He was Mitgrünner van de Vereen Oostfreeske Taal un hett ok mit daarför sörgt, dat de Oostfreeske Landskupp en Plattdütskbüro kreeg. Mit Helmut Hinrichs kriggt een de Keerlke, de hum al lang verdeent hett, so Antje Gronewold van de Vereen Oostfreeske Taal.